



Jaorverslaag 2006-2007



Jaarverslag 2006-2007

De Tempeleers



Stichting De Tempeleers Mestreech
Kochstraat 6
6216 ER Mestreech

Inhaajd

Proloog	3
Vastelaovendsleedsje 2007	4
Jaorvergadering	6
Oetrope Stadsprins 2007	9
De kemissie Financies	12
De kemissie P.R.	15
De kemissie Binnegebäöre	18
De kemissie Kanselarijraod	25
De kemissie Boetegebäöre	30
In Memoriam	38
De Tempeleers-organisatie	40
Epiloog	43
colofon	44

Proloog

Twelf maond zien weer umgevloge
Wat is tied toch veur e raar begrip
Ie me 't good en wel besef
Weer e jaor door d'n vinger geglip
Veur uuch lig e nui jaorverslaag
De zouws 't zelf ouch neet geluive
Es ste 't neet op zwart en wit zaogs stoon
De besjrijving vaan 't aafgeloupe sezoen
Wat veer veur uuch höbbe mage versloon

Vaan 't vereinegingsjaor 2006-2007
Doge veer hiel good us bës
um euver väöl eveneminte te beriechte
die veer in 12 maond verriechte.
Alle kemissies hadde veer opgedrage
um te make hun eige verslage.
daobij de fotoos vaan de eveneminte
bezörge uuch weer die vastelaovends mominte.
e Zier geslaag sezoen wèlle veer noe besjrieve
zoe tot dit ouch veur 't naugeslach bewaord kin blieve.

Veer winse uuch väöl leesplezeer
't redactie team van De Tempeleers.

Mestreech 11 november 2007.

Tempeleers:
Guy Bannier
Nico Kempeners

Vastelaovendsleedsje 2007

Op 't momint tot ederein nog in vekantiesfeer waor, starde 't S.M.V. mèt 'nen oproop um tekste in te sjikke veur de verkezing vaan't Vastelaovendsleedsje. D'n oproop lieverde 33 inzendinge op die allemaal aan 'n selectiekemissie woorte veurgeschreven.

De selectie rizzelteerde in ach leedsjes die op zoondag 5 november 2006 aan 't publiek woorte geprizzenteert.

D'n opzat vaan de prizzentatie waor aanders es in veurgaonde jaore ingegeve nao aonleiing vaan signale die bij 't S.M.V. waore binnegecoume. Oetgaankspunt waor kwaliteit bij 't prizzentere meh och kwaliteit in 't indproduk: de cd.

'n Käör aan artieste zoe wie Joie de Vivre, de Kompenei, Ziesjoem Duo X-elle, Eric Cruts, Maurice Braeken, Jef Verheijde en Truus Willems zóngen de leedsjes twie kier.

Toen waor de beurt aan 't publiek um in 'n ierste stumrunde te bepaole wee in de finalerunde terech zouw koume.

Naotot de veer finaleleedsjes nog eine kier veur 't publiek woorte gezonge bleek oet de twiede stumrunde tot d'n eindoetslaag waor gewoorde:

4e plaots: "wat 'ne perel vaan 'n stad" vaan Patrick Ummels & Wino v.d. Bosch

3e plaots: "Mien Ama" vaan Noël Fabry & Raymond de Pauw

2e plaots: "Op mien eige meneer" vaan Sjef Duchateau

1e plaots: "Reube, Friet en Beer" vaan F. Fernhout, J. Holthuis,

B. Hoekstra en J. Schöpping



Vastelaovendsleedsje 2007

"REUBE, FRIET EN BEER"

Refrein

M'n ma die in vaan Lummel, miene pa dee kump oet Hier
Vaan Mestreech is geine en mien tant die woent in Kier
Veer zien vaan Wiek en Wolder, dao tösse sjaint 't leech
Dao zien veer neet gebore en dao ligk noe zjus Mestreech
Dao zien veer neet gebore en dao ligk noe zjus Mestreech

Couplèt 1

Iech zaog häör bij de statie, dat meidske had väöl gracie
Iech dach aan 'n relatie en iech zag häör: "excuseer"
Zègk wèlste mèt miech sjanse? Zègk miech wie zien mien kanse?
Zie zag "iech wèl gere danse mèt 'ne ras Mestreechteneer".

Couplèt 2

Iech kós häör neet vergete, iech moch toen koume ete
Dat waor toen ech genete mèt reube, friet en beer
Iech wèlde häör versere, 't meidske caressere
Meh pa gaof häör neet gere aan 'ne nep-Mestreechteneer

Couplèt 3

Op aondraank vaan mamake leet iech 't beer miech smake
Iech wis 'm good te rake wie 'nen Tempeleer
Pa zag: "laot iech ins dinke en op de touwkomms klinke
Es iech diech zoe zeen drinke biste ech Mestreechteneer".

Jaorvergadering

Op zoondag 12 november 2006 ging 'n eder dee De Tempeleers en de Mestreechter Vastelaovend good gezind waor intjids op weeg riechting Redót um getuige te kinne zien vanan de Jaorvergadering van Stadsvastelaovendsvereineging De Tempeleers.

Um 11 menute nao 12 leet de Prizzedent mèt de veurzittershamel hure tot 't tied waor um de vergadering te beginne.

In zien openingswäördsjie hëdde heer welkom:

Häöre Excellentie mevr. Maria van der Hoeven op dat momint nog Minister van Oonderwies, Cultuur en Wetensjappe;

Aajd Hoeglöstigheid Norbert en Glauke;

Eus Protecteurs, Börgermétwérkers en neet in de lèste plaots 't Volk van Mestreech.



Alveurens rekening en verantwoording aof te lègke woort iers nog eve stèl gestande bij 't feit tot ouch 't aafgeloupe jaor weer e paar dierbare vaan us dit eerdse leve hadde verlaote.

E momint vaan stèle waor d'r veur Ieren-Tempeleer Jacq. Vijgen; Mence Doorenbosch en John Delahaye, aajd veurzitter vaan de S.M.V.

Binne de Tempeleersorganisatie waore d'r e paar wijzeginge te melle: Henk de Jong naom aofsjeid es Habsjaar en woort in die functie opgevolg door Marcel Janssen. Hans Linnemann stopde es veurzitter vaan de kemissie Binnegebäöre en woort dao opgevolg door Guy Bannier. Ger Beckers sjeide oet es Tempeleer umtot heer dat neet langer kós combinere mèt zie werk.

Vervolgens kraoge Kretser en Habsjaar de gelegenheid um 't jaor touw te liechte door middel van prizzentatie van 't Jaorverslaag en 't financieel euverziech.

De veurzitter vaan de Kanselarijraod spraok aonsletend e woord vaan daank oet aan ex-Prins Norbert en zien ega Glauke. Op 'n ludieke meneer sjélderde

Jaorvergadering

Frans de tounnaodering en 't verloop vaan de pripperatie en de verhuizing vaan 't Prinselek koppel vaan Boschpoort nao de Bilserbaon vlak veur 't Oetrope. De merci woort oonderstriet mèt e sjoen boekèt blommme veur Glauke en de Vastelaovendsveendel veur Norbert.

Wie hij bove al aongekóndeg woort Henk de Jong veur 't froont vaan de aonwezege bedaank veur 't feit tot heer drei jaor de functie van Habsjaar tot volle contentheid vaan 'n eder had oetgevoerd.

Dee merci woort nao Carla bevesteg mèt de euverhandeging vaan e blömke. Dao boe 'nen Habsjaar aofsjeid numph zal ouch 'ne nuie Habsjaar beneump mote weurde.

De Tempeleers hadde dee gevoonde in de persoen van Marcel Janssen. Marcel kraog de Tempeleersplaquèt mèt 't bugelke umgehaange en Resie kraog e sjoen boekèt blommme.



't Is in de tössen tied traditiegewoerde tot tijdens de Jaorvergadering de Vastelaovendsvierder van 't aafgeloupe jaor bekind gemaak weurt.



Euze Vice-Prizzedent Jean Louis Tuinstra spraok euver e geval vaan diplopie, 'ne merkwierdege vörm vaan dobbelzien. In de naoventrint vaan "In den ouden Vogelstruijs" späölde ziech e taferel aof dat d'n diplopie verkaorde. De Vastelaovendsvierders waore gevoonde.

Gruuts wie 'nen aap mèt zeve stert kóndegde de Vice-Prizzedent aan tot Peter Caris

Jaorvergadering

en Tim Niël mèt hun creatie "In den jongen Vogelstruijs" oetverkoze waore um es Vastelaovendsvierders 2006 wijer door 't leve te goon.
Op Vastelaovendszoondag woort die oetverkezing bekragchteg mèt de oetreiking vaan 'ne replica vaan 't Momuskenon.



Op 't ind van de vergadering deilde de Prizzedent nog mèt tot 't Oetrope vaan de Stadsprins 2007 zouw plaatstinde op e gans vernuid Merretplein. De nuen opzat vaan 't Prinsbal zouw weurde gepronlongeerd; veur de Steunpilere zouw getanders weurde georganiseerd en de oetreiking vaan de orde vaan de Gulden Humor zouw in Mestreech goon plaatstinde.

Guido Janssen maakde vaan de roondvraog gebruik um mèt e prachteg gediech te wieze op de file en parkeerprobleme; 't al daan neet verplaotse vaan eus standbeelde en de kare in d'n optoch die mèt hunne versterkende meziek de zate hermeniekes euverstumme.

Heer indegde mèt 'ne merci aan ex Hoeglostigheid en Tempeleers veur de sjeike Vastelaovend 2006.

Ouch woort nog eve geriffereert aan de gewijzegde optochrót.

Naotot ederein in de gelegenheid waor gewees um te zègke wat heer/zie wouw zègke, woort de vergadering geslote en bleef me nog 'n aontal eurkes gezèlleg in de Bonbonnière bijein.

Oetrope Stadsprins

ZOONDAG 22 JANNEWARIE 2007

Zoondagmörge 22 jannewarie 2007 'nen hiele sjoenen daag! De zon waors al vreug wakker en dat kós me ouch zègke vaan de nudege Mestreechter Carnavalsvierders. Want vendaog begós de Vastelaovend 2007 mèt 't oetrope vaan de Prins vaan Groet Mestreech.

Dit jaor waors 't thema vaan 't Oetrope gekoppeld aan de Tempeleersmedaalje: "De Geplökde Hin".

Veuroet gegaange door e groet aontal Mestreechse Vastelaovendsvereineginge, meziekkorpse, zate hermeniekes, 'ne boonte störm vaan verkleiders en 'n aontal es geplökde hinne verkleide Tempeleers ging de Groete Oonbekinde vermomps es directeur vaan de Belastingdeens in 'n sfeervolle cortège vaan de Spoorweeglaon via de Wilhelminabrogk en de Kesselskade naor de Merret.

Aongekoume op de Merret naom Mestreech iers nog aofsjeid vaan de Prins vaan verleie jaor, Norbert I en zien Prinses Glauke, onder 't zinge vaan zien liefleed "Mien Fietske"


Oondertösse woort de Groete Oonbekinde óntdoon vaan zien vermomming en op dat benkelek momint zörgde alle muzikante veur 'n hels kabaal.



Oetrophe Stadsprins

En dao stoont heer daan: Prins Roland I.

In 't dageleks leve steit de nuie Hoeglöstigheid ingesjreve bij de börgeleke stand es Roland Dear, getrouwjd mèt Josien Sommer. Same höbbe zie drei sjatte vaan kinder die luustere nao de naome Oscar, Emma en Lou.



't Prinselek koppel woent aan d'n Heukelommerweeg 27 in Wolder.
In 't leve vaan alledaag verdeent Prins Roland de kos es directeur vaan de Ned.
Weekbladen groep. Dao make ze o.a. eder week de Maospes en 't Zondagsnieuws.



Oetrophe Stadsprins



ROLAND I

PUBLICARICUS BOURGONDICUS VELOCIPEDICUS

Erfprins vaan de Capucijnergaank
Graaf vaan de Heukelommerweeg
Lienhier vaan de Heerlekheid Wolder
Honoriair raodshier vaan alle aw Loomelekriemers
Geheim Kamerhier vaan de Kirchröätsjer Meëdsjer
Titularir Dikke zjiemsleger vaan Klop diech 'n Eijke
Iereconsul vaan alle gedrökpeersde Zakes
Gevolmachteg Berriedreger vaan 't Dragersgilde Pie en Pauw en
Monnie en Gonnies in duplo
Ginneraoi-mejoor vaan de Nederlandse Weekblaajer Gróp
Drappo-kommandant vaan alle Zate Hermeniekes
Protecteur vaan de Mestreechter Vastelaovend

De Kemissie Financies

DE GALA SPONSORAOVEND.

Ouch dit jaor waors de Gala Sponsoraovend weer 'n euverweldelegend succes. Obbenuits waore alle certificate aan de maan/vrouw gebrach. Zoe wie bekind is dit d'n avond boe oondernummend Mestreech ziech op 'n informeel wijs kin treffen in 'ne fantastische ambiance op Château Neercanne. Roond 19.00 oor arriveerde de ierste manneleke gaste um hun opwachting te make bij d'n Ziene Hoeglöstigheid um veur 't iers de nui gala sponsor mansjeteknuip in oontvangs te numme, de dames woorte ge-ierd mèt de Groet-Offeseersorde van De Tempeleers.

Aonsletend verplaotsde de gaste ziech nao de bovezazole um dao, ouch weer veur 't iers kinnes te maake met Zjer de Sjeet, later gebleke, Mestreechs pikvogelkampioen. D'n euversteek nao de grotte waor gaw gemaak en 't fies kós beginne.

't Ete waors weer vaan 'n veurtreffeke kwaliteit en me kós keze vaan belon oesters tot terrine de ris de veau, vaan saumon marinée tot piece de veau.

Ouch bestoond de meugelekheid um in de röstege ambiance vaan 't kestiel zelf te genete vaan e kiesbuffét, in combinatie met 'n sjoen stökske accordeon meziek. De muzikaol umliesting woort verzorg door The Spy, Trio Swing Along en roond 23.00 oor nog 'n optrejje van Dieter Koblenz.

In 'n fantastische plezerege en oongedwoonge umgeving woort gedans, gekeuveld en aan d'n inwendige mins gedach.

Roond de klok vaan 02.00 oor waor 't fies veurbij en kós ederein weer trökkieke op 'ne bezunder geslaagden avond.

TRÓSJER

Wie eder jaor heet uzze oonvolpreze trósjer, Ton Dello, ziech ouch dit jaar weer 't vuur oet de slóffe geloupe. Onvermeujaar is heer weer op "struiptoch" langs de Mestreecher middestand gegaange. Es geer Ton Dello kint, daan kint geer ouch, zien rizzeluutheid. 'ne Nein weurt eigelijk neet geaccepteerd. Is de baas neet aonwezeg daan kump heer trök, kin de kassa neet ope daan kump heer trök. Geer kint 't zoe gek neet verzinne meh Ton kump trök tot heer zien kaart, oongeach 't bedraag, aan de maan, of vrouw, heet gebrach.

Nui dit jaor waors 't feit tot d'n Hoeglöstigheid vaan 2006, Norbert I, Ton 'ne middag heet geholpe. Neet allein is 't leuker um same oonderweeg te zien, meh op dees meneer kin 'nen Aajd



De kemissie Financies

Hoeglöstigheid ouch ins zien han "voel" make en aon 't lief ervare wat 't betekend um sent veur de Vastelaovend bijein te sprókkele. 'n Nui traditie liek gebore! Gelökkeg is al dit geloup neet veur nik gewees, dit jaor heet d'n opbrings vaan de trósjeractie weer de verwachtinge euvertroffel! Chapeau aan alle deilnummers! Ouch dit jaor is de Jacques Vijgen trofee, La Folie, aon 'ne deilnummer vaan de Trósjeractie euverhandeg. Dit beeldsje, wie eeder jaor gemaak door Henriëtte Schrover, is dit jaor oetgerek aon Patrick Lexis, oetbater vaan, onder andere, La Colombe oppe Merret. Heer is neet allein ein vaan de drievende krachte achter de eveneminte die op de Merret gehawwe weure meh heer is veural 'ne oondernummer met 't vastelaovendshart op de gooij plaots.

PARTICULEER ACTIE

Ouch dit is inmiddels in neet weg te dinke traditie. Dees actie, bedach door de jaomer genög dit jaor gestorve college Tempeleer Jan van de Bergh, gedoon onder de regie van Boy Olivers, riech zich op al die anoniem Mestreechtenere die uzze Vastelaovend welle steune. Wie eder jaor oontvinge ouch dit jaor weer hoonderde Mestreechtenere 'n sjoen kaart, belangeloos gedrok door "Kunst Adelt", met dao-op 'nen inspirerende teks vaan Bert Beenkens. Door middel van die kaart nudege veer de Mestreechtenere oet um 'n klein financieel bijdrage te lievere aan de Mestreechter Vastelaovend. Tot dit jaor dege veer dao altied 'n accepgirokaart bij. Dit jaor hóbbe veer, oet koste euverweginge, de accepgiro kaart neet bijgesloten. Jaomer genög is dit gei wies besluit gewees. Op de ein of aander meneer is de accepgiro, ligkend op de buro, toch e soort vaan geheugesteunsje. Es gevolg hijaan heet de actie minder opgebrach es veer gedach en gehoop hadde. Wel nog altied e sjoen resultaat meh minder es aander jaore. De lès is dus dudelek!

DE STEUNPILERE BIJEINKOMS VAAN ZOONDAG 4 FEBRUARI 2007.

De "Steunpilere" ziech in 't leve gerope um de "Mestreechter Vastelaovend" financieel te ondersteune. Me sponsort en krijg 'n unieke geëmailleerde plaquèt, die eder jaor 'n aander thema heet. 't Is 'n ech collectors item.

Dit jaor waor gekoze veur 'ne nuie opzat, 's mörges mèt 'ne brunch same mèt Stadsprins Roland I mèt es thema MOMUS, en daan ouch trök nao 't veurmaoleg vereinegingsgebou van de sociëteit Momus aon de Vriethof.



De kemissie Financies

De Momus Tempel is geboujd mèt es groondgetal èlf. De gievel is 11 meter breed, de lengde van de binnezaol 11 meter, 't balkon heet 2 x 11 pilere, mèt plaoits veur 11 (neet te dikke) lede van de raod van elf. Op dizze middag heet Stadsprins Roland I ein vanan de oontbrekende 11 pilere op de balkon trökgeplaots.



Wat waor 't daan och neet sjoener um op dees geweldege locatie eus "Steunpilere" werm te mage oontvaange 's mörgens mèt 'nen oetgebreide brunch same mèt Stadsprins Roland I en zien charmante ega Josien, en 's middags veur de Steunpilere die neet deilnaome aan de brunch.

Ouch woort op dee middag de Federatie Oondernummers Vereining Mestreech oontvaange um 't traditioneel gouwe narrekepke op de revêrs van Roland I te spange.
Dit prachteg zjuwielke weurd edere jaor mèt de hand gemaak door Servé Monfrance.

Veur 't iers woort dit jaor 'n sjelderij geveild en de opbrings waor bestump veur de organisatie van de Mestreechter Vastelaovend.

't Waor 'ne succesvolle en veural gezellege mörge en middag same mèt eus Steunpilere.

De P.R.- kemissie

Wie eder groeter organisatie kinne och De Tempeleers neet zonder contacte mèt de peers en de media. Daorum start de P.R.-kemissie al vreug in 't sezoen häör activiteite um 'n eder dee intresse heet in de Vastelaovend good te informere wat zoe-al stelt te gebäöre.

De ierste bezundere groep boe de Vastelaovend aon geprizzenteerd weurt, zien de studente in Mestreech. 'ne Veurliechtungsaoavend mèt informatie dee speciaal



veur hun vaan belaank is, weurt eeder jaor door de besture vaan de studentevereiniginge good bezoek. Mèt naome 't speul roond Vrow Wielemösj, die es hospita de studente mèt ope erm in de Vastelaovend oontvingk, kriëg väöl aondach. Dudelek weurt aangegeve wat wel en liever, neet kin. Dit heet aofgeloupe sezoen es rizzeltaot gehad tot studentevereiniging

Maastrichtse Disputen Federatie Vrow Wielemösj op 'n wel zier bezunder plaots had opgeborge. Hoeg op d'n torie van St. Jaan heet 't vruiwke stoon ploonke. En ze is dao neet geklajd.
Ouch veur de greujende gróp internationaal studente organiseert de PR kemissie 'ne speciaole veurliechtungsaoavend in samewérking mèt Studium Generale. In 't Ingels perbeert Tempeleer Wim Fischer eus boetelandse studente get wijzer te make euver de "drei sjoenste daog vaan 't jaor".

Nao de jaorvergadering zien och, in goo samewérking mèt de NWG, de Infopagina's klaor um zjuste informatie euver te bringe. Dao neve goon d'r och e groet aontal peersberichte de deur oet. Väöl aondach woort aofgeloupe sezoen gesjoonke aan de róttes veur de cortèges. De brögk waor jummers nog neet veerdeeg, zoetot d'r euver 'n ander trajek es gebruukelek van Wiek nao 't centrum vaan de stad getrokke woort.

Naovraog bij de behieder vaan euze website liert tot vaanaof midde november och 't aontal kiere tot de site bezoek weurt sterk stijg. 't Mieste weurt de site bezoek in de daog nao 't Oetrope vaan de nuie Stadsprins. Vaan euver de ganse wereld wèl me wete wee



De P.R.- kemissie

veurgeit in de Vastelaovendsdaog. Ouch hei kin me de nudege informatie euver de Vastelaovend en eus activiteite trök vindé.

Op dinsdag 6 februari woort in 'ne aofgeloje Kaffee Priem same mèt 't traditionele Beersteke, d'n Tempeleer 2007 geprizzenteerd. Meh dat gebörde pas gans op 't ind vaan d'n avond. Veuraofgaond aan dat momint woort iers 't vastelaovendsbeer vaan Brand goodgekäörd.




Gans verpópzak waor Jo Caris, dee dit jaor de Tempeleersvlaoj heet gekrege veur zien verdeenste veur de Mestreechter taol.

Oetenaard woort ouch dit jaor stèlgestande bij de dames die door de advertentie verkoup d'n Tempeleer meugelek make. Aon de sjoenste/origineelste advertentie weurt de Noskaar touwgekind. De annonc van Hästens bedden-store waor dit jaor de bëste

De P.R.- kemissie

D'n avond waor al 'n stök op weeg wie Prins Roland I 't ierste exemplaar vaan d'n Tempeleer in oontvangs moch numme. Umtot heer de aofgeloupe jaore vaan-oet zien werk betrokke waor bij de realisatie vaan de gezèt , waor 't ne gansen toer gewees um d'n Tempeleer veur häöm verborge te hawwe. En umtot, wie Tempeleer Charles Peeters 't zag:

" 't Bekans e keukske vaan eige deig waor" kraog Prins Roland D'n Tempeleer 2007 ouch zoe aangeboje.



Bij e gleeske beer woort door bezoekers vaan d'n avond al 'ns good gelache um d'n inhaajd vaan eus Vastelaovendsgezèt. Soms ouch blij tot ze zelf neet in D'n Tempeleer stoonte.

De kemissie Binnegebäöre

't Aofgeloupe sezoen zien de versjèllende eveneminte vaan de kemissie Binnegebäöre good geslaag. Dit is mèt te daanke aan de geweldege steun die dees kemissie heet vaan häör bôrgermètwérkers. Want zoonder hun hòlp geit 't ech neet. Daorum is aofgeloupe jaor 'nen aanderen opzat vaan de bôrgermètwérkersavend gekoume um dees lui nog ins op 'n bezunder meneer in 't zönneke te zette. De kemissie Binnegebäöre besteit oet versjèllende subkemissies. Hun bevindinge vaan 't good verloupe sezoen 2006-2007 koume noe aan uuch veurbij.

DE KINDERKEMISSIE MÈT HUN KINDERAKTIVITEITE.

De kinderkemissie vaan de Tempeleers verzörg al jaore 'n vieftal activiteite. Dees activiteite numme ouch 'n belangrike plaots in in 't Vastelaovendsgebäöre. 't Gezègkde "Wee de jäög heet, heet de touwkomms" is ouch vaan touwpassing op de väöle initiatieve die de kinderkemissie onder leiing van Guy Bannier eder jaor weer mèt väöl enthousiasme organiseert. De kinderkemissie besteit oet 14 Bôrgermètwérkers, 'ne gróp vrijwellegers die zier actief is um alle activiteite good te laote verloupe.

DE KINDERREVUE OP 28 JANNEWARIE.

Veurt d'n derde kier in successie woort 'ne kinderrevue georganiseerd in de Festi-Village. Ouch dit jaor e groet succes. Zое'n 110 kinder prizzenteerde ziech mèt e leedsje, denske, meziek of act. Dat gebäörde allein, es duo of es gróp en zelfs 3 sjaoles en inkele jäögvereiniginge lete hun talente zien en hure. Alles levendeg en in 't Mestreechs. Mestreech bars vaan 't talent. Zое'ne revue is 'n sjoen gelegenheid um al die talente 'ne kans te geve. Versjèllende kinder-artieskes mochte ouch op aander eveneminte vaan De Tempeleers hun talente laote zien. Zoo kraog de Kinderrevue nog miejer bekindheit.



De revue woort geprizzenteerd door twie kinder same mèt Ursula Garnier en Patrick van de Weijer. Es roejen draod koum ouch dit jaor 't revue leedsje, gesjreve door Ursula, geregeld aan bod. Dit leedsje sloog geweldeg aon en woort geregeld door de ganse zaol flink mèt gezonge en veural mèt gedans.

"Veer wèlle zinge, danse en goon feeste!
Mèt alle kinder vaan Mestreech.
Want 't is weer bijnao Vastelaovend,
Dus haw mer vas daan goon v'r al op weeg".


De kemissie Binnegebäöre

't Waor 'ne gezèllige drôkde in de zaol en de kinderrevue heet noe 'n vas pläätske gekrege in de Vastelaovendskalender.

OPENING KINDETEIKENWEDSTRIJD OP 3 FIBBERWARIE.

De kins diech aofvraoge of de naom Kinderteikenwedstrijd nog wel good is. De prachtege kunstwérke lieke mie op knutselcreations vaan hoege orde, zoe sjoen waore dit jaor de opgebouwde stands.

't Aofgeloupe sezoen heet de hal vaan 't azM deens gedoon es restaurant vaanwege interne verbouwinge. Daorum moos de expositierruimte veur de basissjaole en peuterzaole aongepas weurde. Dat koum good oet, want noe mochte veer op 'n väöl gesjikter plaots de prachtege kunswerke vaan de sjaole exposere, zelfs de gaank vaan de loupbrög nao 't parkeerdèk waors nudeg. Want dit jaor waore d'r jummers väöl mie deilnummende sjaole en ze hadde geweldeg hun bès gedoon. De hal weurt zoe eder jaor umgetouverd tot 'n zier lösteg en carnavalesk gebäöre, boe zoewel de lui in 't hospitaol es de väöle bezeukers met groet plezeer nao kieke. Op zaoterdag 3 fibberwarie waor Prins Roland 1 in 't azM prizzent veur de officieel opening en de sjoen educatief prijze, besjikbaar gestèld door väöle sponsore, oet te reike.



De kemissie Binnegebäöre

De opening waors dit jaor veur 't iers ouch gët aanders. Kinderartieste oet de Kinderrevue troje op um zoe de opening mie cachèt te geve en dat sloog aon. Stoont 't veureg jaor in dit jaorverslaag tot de belangstëlling minder waor, dit jaor waors dit gelökkeg neet 't geval. Door de expositié ope te stèlle veur ander jäög vereiniginge en instëllinge waore d'r leefs vief deilnummers mie es verlige jaor. e Good teike. Bij de opening waors 't ouch gezèlleg drök. De Kinderkemissie geit op d'n ingeslage weeg wijer en deit dat in samewérking mèt 't azM umtot bekind is tot dees expositié vräög bringk bij väöl kraanke in 't hospitaol meh ouch bij de gezon lui die in 't azM op bezeuk koume.

'T GROET KINDERFIES OP 11 FIBBERWARIE.

D'n opzat vaan dit fies blijf e succes. Ouch dit jaor waor 't weer gezèlleg drök in de Festi-Village. Kinder ammeseerde ziech in de grimeerhook, op de groete sjievel, in de knutselhook, bij 't button apparaat. Ze kóste e denske doen, nao de popcorn kraom goon, meh veural sjoen verkleid ziech laote zien, danse, hosse en springe. Daoneve waore versjèllende optrejjes vaan kinder oet de kinderrevue.

Dit jaor waors de zaolopstëlling gët veranderd. D'r waor 'n kinderspeulplaats in 't

midde vaan de zaol, boedoar de kinder alle ruimte en aondach veur ziech hadde en 'ne groete rijaloet kós plaoitvinde.

Ziene Hoegen Hoeglöstigheid kaom oetenard ouch op bezeuk en góng gans op in de groete massa kinder. De hiere Tempeleers höbbe dee zoondag e record aontal knuipkes kinne oetdeile aan al die kinder; get wat eder jaor zier weurt geaprecieerd.



SJAOLE BEZEUK OP 15 FIBBERWARIE.

Op donderdag veur de Carnaval geit de Stadsprins mèt 'n dillegatie Tempeleers versjèllende sjaole bezeuke. Miestal zien dit sjaole die mètgedoon höbbe aan de kinderteikenwedstrijd of die gevroag höbbe um ins aan te koume of die e bezunder fies höbbe gehad.

De winners vaan de kinderteikenwedstrijd kriegen daan d'n hoofpries oetgerike.

't Vèlt eder jaor op wat veur meujte de sjaole



De kemissie Binnegebäöre

numme um de Prins en zien Tempeleers te oontvaange. Sjaole prizzentere ziech daan mèt e klein optrejje, beje de Prins gët aon en aon de innerleke mins weurt good gedach.

D'n daag begint volges traditie bij Maison Louis oet appreciatie veur hunnen inzat en betrokkenheid bij de Mestreechter Vastelaovend. Daoropvolgend zien d'r 5 sjaole bezeuk.

KINDERKESTUUMWEDSTRIJD OP 20 FIBBERWARIE.

't Waor dit jaor weer 'ne bezunder gezèllege middag. 't Sjoen weer had gët minder kinder nao de Festi-Village getrokke, meh die dao waore, waore zier bewus gekoume um hun sjoenste pekske te laote zien. De kinder mochte ziech zjus wie bij 'nen echte modeshow laote zien door te loupe op 'ne plancher en mèt de volle sjienwerpers op hun geriech.

En wat waore ze weer sjoen: pekskes gemaak door de awwers, ama's, tantes of zelf inein gefisternöld. Kinder dörfde ziech te laote zien aan de jury en de lui in de zaol en zellevers aan de tv -ploog dee aonwezeg waors. Ze hadde d'r väöl plezier in en de winners kraoge op zaoterdag nao Carnaval hunne pries in 't lokaal vaan de Stadssjötterij. De kinderkestuumwedstrijd waors ouch dit jaor weer e groet succes.

ZITTING: 26 JANNEWARIE 2007



't Kós neet oetblieve. De entreekaart deeg al zoe get vermoede. D'n druim vaan de oetbaters Truus en Mao én d'n ober Noël vaan kaffee de Zeuten Inval woort realiteit. De kaffee kraog 't predikaat "hofleverancier" en woort heidoor e bitsje keuninklek. H.M. de Keuningin mèt häör gevölg koum dit zellevers vertelle. Daobij kraog ze ouch vaan 't leefste jungske e biedemeierke aongeboje. Ze voond 't zoe gezèlleg, tot ze allemaal plakke. De kaffee waors gans oranje geseert, zjus wie de fietskes mèt keuninginnedag kriege. Famfaar St.-Joezep, die zelfs present is es de kat heet gejungeld, kaom häör opwachting in de kaffee make. Mer dit waore neet de einige artieste, die deen avond veur de gaste in de kaffee höbbe opgetroje. Angelina kaom op bezeuk, zjus wie de Wieker Hofzengers, Dora 't zusterke van Cora, André Rieu mèt z'n orkes, Jef Diederens, Patrick Muytjens, Jef Verheijde, Joie de Vivre, de dansgröp van Heinz Stitzinger en de dames



De kemissie Binnegebäöre

vaan LUV. Met aander wäörd, dees vijfde oetgaof vaan zitting Kaffee de Zeuten Inval waor weer 'n fantastische beleving en pasde perfek in de groete opmaot nao de Vastelaovend.

KLEVARIE: 15 FIBBERWARIE 2007

De Klevarie zitting waors dit jaor weer een vaan de sjoenste hoegtepunte vaan Vastelaovend-tradities boe ederein mèt väöl plezier aan mèt deit.

'ne Fantastische avond dee al begós mèt de Kinderköpkjes gevolg door Ziesjoem, Jef Verheijde, Frans Theunisz en Beppie Kraft. Wie eder jaor waors de grandioes finale weg-gelag veur us eige garderizzjemint "De Kachelpiepers".

Ederein geit vol d'r in um de lui vaan Klevarie weer 'ne oon-vergeteleke avond te bezorge, en hun weer 'ns trök te laote dinke aan hunne Vastelaovendstied.

Wat veer noets mage vergete en boe veer daankbaar veur mote blieve is tot zie us 't Vastelaovendviere höbbé gelierz!

E woord vaan daank aan de directie en metwérkers vaan Klevarie/Vivre is ouch zier zeker op zien plaots. Veer kriege dao eder jaor geweldege mètwérking, dat maag ouch 'ns gezag weure!!



De kemissie Binnegebäöre

LSO KONZÈR.

Ouch dit jaor gaof 't LSO twie kier 'ne Vastelaovendskonzèr in Mestreech. 't Is alweer veur de 54 e kier tot dit gebörde. Dit jaor mèt 'ne nuie zier bevloge jonge dirizjent Jean-Pierre Cnoops en 'n nuie prizzentator Huub Claessens, dee zoewel musicerend es zingend zien groete talente leet zien en hure. Jean-Pierre Cnoops dörfde 't aon um mèt 't LSO e gevarieerd program te bringe boejib es roejen draad de musical Wonderful Town vaan Leonard Bernstein waors oetgezeuk. e Klassiek orkes wat gét big band echtege meziek späö-lde op 'n zier knappe meneer. Daoneve troje Geralt van Gemert en de Sanseveria's op,



die bezunder good in de smaak waore gevallen van 't pebliek. 't Pebliek dat genote heet vaan 't Vastelaovendskonzèr vaan 't LSO dat zoe op hun meneer 'n traditie in iere hèlt.

'T GROET GALA PRINSEBAL

De nuie opzat vaan verleie jaor is ouch dit jaor e groet succes gewoorde, dit bleek oet de groete aontalle gaste die veer mochte oontvaange. De orkest, de Jack Millionband en Three of a Kind stoonte weer garant veur e daverend dansfies. 't Optrèjje vaan Jef Verheijde later op d'n avond waor 'n sjiek intermezzo.

Aonkleïng mèt sjiike ballonne luuchters, draankveurzening en de versterking vaan d'n inwendige mins waors good verzörg. Nog noets waore zoeväöl lui op "De Bal"es dit jaor en nog noets bleve ze zoe laat. Veer kinne uuch alvas op veurhand vertelle dat De Balgengers vaan de koumende editie d'r op mage rekene tot dizze succesvol ingeslage weeg zien vervolg geit vinde in de koumende editie vaan 't Groet Gala Prinsebal.



De kemissie Binnegebäöre

NOSTALLEGASIE: 10 FIBBERWARIE 2007

Dit jaor alweer veur de 15-de kier 't Oerfies vaan de Vastelaovend, de Nostallegasie!

De Festi-Village stond weer bol van de geweldege, unieke en sjieke creaties die 't volk vaan Mestreech dao lete zien. Veer zaoge Poolse nejeerse, Moordwiet-wiever, Fc de kampioenen, 'nen echte kraomborrel, de bejaorde Tempeleers, balletje balletje, enfin te väöl um op te numme.



Veur de jäög waors dit kier Zooper oetgenudeg um ouch e stökske meziek te koume make, same mèt Jef Verheide en Frans Theunisz waore dit de gaste die 't alum bekinde Mestreechs Vastelaovendsorkes oondersteunde. 'n Orkes dat neet mie weg te dinke is bij dit spektakel.

't Naaks Geval (pries veur origineelste/sjiekste/apaartste creatie) is dit jaor gewonne door de imitatie vaan Fc de Kampioenen, de Belzje kemedie serie. Veer zien noe alweer benuid wat 't volk vaan Mestreech ziech bedink veur koumend jaor....



De kemissie Kanselarijraod

KLATERGOUD VIA DE "ZIJ-RÓT

Sins inkele jaore doen veer zake mèt de Chineze. Op 't momint tot de Kanselarijraod ziech realiseert tot de oetgifte vaan doezaende spengskes, prinseknipkes en diverse medaaljele zwoer in de pepèrre geit loupe, geit e lempke (zègk mer e Chinees lampiönneke) branne.

Zjus wie väöl bedrieve oontkoume veer d'r neet aan um in verband mèt de koste oet te wieke nao China boe de kospries vaan medaaljele e stök lieger ligke.

Veurtot dat zoe wiet waors, 'n hendege oetzeukerij.

Op de ierste plaots waore d'r in de naoventrint gein fabrikante die de kwaliteit kóste lieverie die De Tempeleers persé wouwe höbbe. Nao riep beraod kós ziech eine 'ne zekere Marco Polo rappelere dee oets de handelsrót nao China opelag en Europa riekelek kós veurzien vaan onder aandere zijje stoffe.

Nou es dee noe neet gewees waors hadde veer missjiens neet zoe'n snoen medaaljes gehad.

Beloert ze uuch nog mer 'ns good! Veur 't aofgeloupe jaor bestoond de Prinsorde oet: 't Maske En de Tempeleersorde in diverse gradaties waors: de Geplökde Hin



GARDERIZZJEMINT DE KACHELPIEPERS.



Zjus wie aander jaore weurt 't Carnavalssezoen vaan de Kachelpiepers geopend in Hier bij 't oetrope vaan de Prins vaan de Sjraweleirs. Vervolges op zaarterdag 20 fibberwarie nao St. Pieter boe de nate confetti mèt bek oet de loch veel. Daan is 't zoe wied!!! Zoondag 21 fibberwarie 2007, oetrope vaan de Prins vaan groet Mestreech op de

De kemissie Kanselarijraod

Merret. Sjoen weer, hiel väöl lui, 'n grandioes stumming en 'n perfecte cortège mèt 't Garderizzjemint de Kachelpiepers es opening van dees ouverture. 't Garderizzjemint de Kachelpiepers kraog vaan Ziene Hoegen Hoeglöstigheid de oetnudeging eine aovend te rippertere op zien binneplaots. 'n Grandioes festijn. Maondagaovend nao 't oetropre de installatieavond vaan de Kachelpiepers. Nui Kachelpiepers kriege hun pluim en de res vaan 't korps weurt door de Hoeglöstigheid gedecoreerd mèt de nui medaaljes. Vervolges in Kachelpiepers tempo nao de Keemeleers, Malberg, Vijverdal, Klevarie en nog väöl mie eveneminte. En tössedoer 't lievere vaan Prinsewachte bij vizietes vaan de Stadsprins aan vereineginge, bejaorde, kraanke etc. Eindelek mage en kinne de Kachelpiepers d'n Hoegen Hoeglöstegheid veurgoon en begeleie in de drei sjoen daog vaan Mestreech, 't inhole, de groete-optoch en de familie-optoch. Sjoen zonneg weer en 'ne fantastische ambiance mèt e good exercerend en speulend Garderizzjemint. Ondaanks al hun plezier höbbe ze dëks hun gedachte laote oetgoon nao eine vaan de lede dee in Uruzgan zien werk moos doen: "Dennis Doms". In e gebed, neet zoonder geavaar, mèt hiel väöl zand, groete hits en geine Carnaval. Toch heet heer touwstumming gekrege um ziene Carnaval dao op besjeie wijs te viere. In 't kort volg hij onder zien persoenlike beleving in kamp Tarin Kort, Uruzgan.

"Op Vastelaovendszoondag, zèt iech miech 't sjleepke op mèt mien pluim, spang mien medaajes op (jao ouch al die vaan dit jaor) en gaon met 'n tuut vol medaaljes op weeg naor miene wérkcontainer. Oonderweeg zeen iech al get lui raar nao miech loere, en veural die Australiërs wete neet goot wat ze mèt miech aonmote. Alle Mestreechteneere kriege 's mörgens bezoek en weure opgenome in ofwel de Hoesorde vaan De Tempeleers of in de Prinseorde vaan Ziene Hoegen Hoeglöstigheid, en geluif miech geer wèt neet wat zoe e "stökske" iezer beteinkent este daag in daag oet mèt elend en ermooj weurs geconfronteerd. Eve zuuste de gedachte trök goon nao dat sjoen plein dao in Mestreech boe drei daog laangk de bom bars, eve alles vergete. Hiere Tempeleers, vrun vaan de Kachelpiepers, bedaank veur eure steun, veer höbbe same e stökske Mestreech en Mestreechter Vastelaovend in Afghanistan achtergelaote en iech wach noe op de oetnudeging veur de Galazitting vaan de Stadvastelaovendsvereinigung vaan groet Tarin Kowt.....wee wét 't al..... Bedaank",

Dennis Doms.

Tösse al dees evenmintie door zien de Kachelpiepers in Geleen gewees nao 't Euregional Gardetreffen. Hei waore ze es ein van de negetien stadsvereineginge present.

En tot slot de aofsletting vaan 't sezoen in Hasselt. Nao jaore heet 't Garderizzjemint ziech weer laote zien mèt haafvaste in Hasselt. Ouch koumend jaor stoon de jonges en meidskes vaan 't Garderizzjemint weer tot euren deens vaan de noe nog oonbekinde Hoeglöstigheid.

De kemissie Kanselarijraod

MACHSEUVERDRACH

Nao de confetti-douche op de Mönt te höbbe doorstande en de hommage aan 't Mooswief, de patroenes van de Mestreechter Vastelaovend, maakde Prins Roland I ziene zwajeuzen entree in de hal vaan 't Stadhoes op de toene van zie liefleed 'Reube, Friet en Beer'. Euze Sirremoniemeester stoont al in d'n aonslaag um d'n Hoeglöstigheid te informere en confrontere mèt wat die vaan us zoe al aan ströppestreke hadde oetgehaold 't aofgeloupe jaor.

Meh veurtot 't zoe wied waor, naom euze bôrgervajer Gerd Leers 't hef in han en begós 'n ederein oetgebred welkom te heite. Es otoriteite had 't college nao Mestreech laote koume: Häöre Excellentie Maria v.d. Hoeven, minister van Oonderwies, Cultuur en Wetensjappe; d'n hier Hans Wiegel en d'n hier Geert Dales, bôrgemeester van Leeuwarden.



Vervolgens naom heer ziech royaal d'n tied um oet te lègke wie good tot heer en 't College wel gefunctioneerd had. Gruuts wie 'nen aap mèt zeve stert waor Zjérke euver 't feit tot heer 't Europees Verdraag nao Mestreech had wete te hole. Mèt 't oetdeile vaan allerlei attribute probeerde 'die vaan us' de aondach aof te leie vaan de besturleke missers die aofgeloupe jaor waore begaange. En um toch dee sleutel mer neet oet han te hove geve probeerde Zjérke zelfs nog mèt e filmke van Flikke, de Tempeleers in e koed daagleech te stelle. 't Moch häöm evels neet late. Zelfs 'n enquête euver de naomsbekindheid vaan de Tempeleers kós häöm neet mie redde.

De kemissie Kanselarijraod



Wie 'ne roejen draod door 't verhaol staak de Sirremoniemeister d'n draak mèt 't college door alles op te haange aan 'shitty-marketing'.

Netuurlek kós 't commentaar euver 't wel of neet aonlègke vaan d'n 10e of waor 't noe toch d'n 1ste baog bij de Aw Maosbrögk neet oetblieve.

Ouch euver 't parkere in Mestreech en de daouveur in 't leve gerope doseer-verkiers-leechte, kraoge 'die vaan us' 'n veeg oet de pan.

Meh 't mieste broch heer Zjérke aan 't sjrikke wie vaan achter oet de hal onder begeleining vaan veer heraute 't Verdraag vaan Rome nao väör woort gebrach. Boe euze borgemeester in e vleegmesjien vol peers veur nao Rome waor gewees, kóste De Tempeleers 't gewoen bij Leon Frissen langs de Maos goon ophole.

Op groond vaan de constatering tot d'r in hoofzaak sprooke waor gewees vaan 'shitty-marketing' stélde de Sirremoniemeister vas tot rechtens aw traditie de mach aan de Prins touwkaom.

Veur 'die vaan us' bleef nik's anders euver es veur drei daog de verlofskaart te pakke.

Mèt de euverhandeging vaan de zèlvre scepter en de Stadssleutel aan Prins Roland I gaof Zjérke ziech gewonne.



De kemissie Kanselarijraod



VASTELAOVEND EN DE K.R.O.- T.V.

Zier bezunder waor tot aofgeloupe sezoen de Vastelaovendsdaog 't onderwerp waor veur 't tilleviesieprogramma "Het gevoel van....." van Fons de Poel. Es rizzeltaot vaan 'n chique samewérking tösse de KRO en De Tempeleers kraoge de kiekers, in Mestreech en wied daoboete, e zier bezunder verslaag vaan de Mestreechter Vastelaovend. Mèt naome door de aondach veur 'n aontal zier speciaol bezeuke, - die bij meinegein nog gans oonbekind waore meh 'n depe indrok achterlete -, kraog de Mestreechter Vastelaovend 'n uniek beeldverslaag boe ouch de Hoeglöstege familie nog gere op trökloert.



De kemissie boetegebäöre

INHOLE



tège gevörmp en 't Garderizzjemint van de Kachelpiepers stoont keureg gereid um de Hoeglöstigheid achter de nudege hermenieje via de Wilhelminabrogk nao de Merret te bringe.



't Groet momint vaan Prins Roland I. Nao 4 weke laank in zie rokkestuum " te höbbe gewoend " moch heer ziech vandaog prizentere in zien Bourgondisch pak. In de vreuge mörge vaan zaoterdag 17 fibberwarie 2007 woort heer in 't Prinselek Pelies bewoonderd door femilie en Tempeleers. 't Waor e bezunder emotioneel momint veur euze Prins en ederein dee dao getuige aan moch zien.

Vervolges in sneltreinvaart nao de Lijnwérkplaots in Lummel. Dit jaor höbbe de Blouw Ingele oet Lummel d'n Hoeglöstigheid oontvange op 'n nui locatie direk gelege tösse de versjèllende treinstelle mèt es decor sjoen zweer locomotieve.

Nao die oontvangs ging 't gezelsjap in d'n trein nao de statie van Mestreech boe in de hal nog 'n korte ceremonie plaots voont.

Veur de statie had ziech al 'ne cor-

um de Hoeglöstigheid achter de nudege hermenieje via de Wilhelminabrogk nao de Merret te bringe.

De kemissie Boetegebäöre



DE VASTELAOVENDSDAOG.

DE GROETEN OPTOCH ZOONDAG 18 FIBBERWARIE

Vendaog, d'n daag vaan de woerheid! De deilnummers aan de Groete Optoch kóste de nui rót oetperbere. Via de opstèlplaots aan de St. Meertenslaon/ Wilhelminasingel ging 't via de Wilhelminabrogk nao de Kesselskade , Mestr. Brökgstraat riechting Vriethof/Merret.

De zon stond 's morgens al hoeg aan d'n hiemel en de temperatur waors zomers.

Weke, nein maonde laank höbbe de verleiders genejd, getummerd en geverf. Noe waors 't hunnen daag um ziech te prizentere aan 't volk vaan Mestreech. Vaanaof de nui opstèlplaots in



De kemissie Boetegebäöre

Wiek trok d'n optoch , veuraofggaange door de Kachelpiepers en de Prinsewagel mèt dao-op Prins Roland I, nao de Merret in Mestreech.

'n Sjoene boonte störm mèt väöl wagele, verseeerde keerkes, kojtse opgekalle-faterd mèt ballonne, serpentine, maskes e.z.w. zate hermenieje, gróppen en einzelgänger. Dees cortège trok langs de iereplaots veur d'n theater boe d'n Hoeglöstigheid same mèt zien Prinses orelaank kós genete vaan al 't sjoens wat de echte Vastelaovendvierder ineingefisternöld had.

Veer kinne constatere tot eder jaor 't aontal wagele in d'n optoch vaan Mestreech groeter en sjoener weurt.

Veur d'n duuster waors 't ind vaan d'n optoch op de Merret.

D'n optoch vaan Mestreech is neet te besjrieve. Dit fenomeen mote de lui mèt make um de sfeer en 't plezeer te preuve.



FAMILIE OPTOCH 19 FIBBERWARIE 2007

Ouch tijdens de Femilie-optoch op maondag 19 fibberwarie 2007 waors de stad Mestreech euvergote mèt 'n straolende zon.

Zoewel de papa's en mama's, de ampa's en ama's mèt kinder en kleinkinder es deilnummer aan de cortège of kiekers langs de rót hóbbe 'ne onvergeteleken daag gehad. De sjoen oetgedosde femilies vertrokke oet Wiek via de Wilhelminabrogk nao 't Vriethof.

Eder jaor heet de jury han vol mèt werk um de sjoen verkleide gróppen en femilies op de foto vas te lègke en in good euverlègk de winners aan te wieze.

Nao geparadeerd te hóbbe veur Prins Roland I trèk de familie zingerend door de straote vaan Mestreech, dèks tot in de late ore.

De kemissie Boetegebäöre

De kinderkemissie verzörg de zjurering van de gróppen bij de femilie-optoch. 't Is neet gemekelek veur de jury um oet al die sjoen gróppen winners oet te keze. Ze verdene eigelek allemaol 'ne pries. Op zaoterdag nao de Carnaval kriege de winners hun prijze oetgereik in 't lokaal van de Stadssjötterij.

DE ZATE HERMENIEKES 2007

MAONDAG 22 JANNEWARIE IN DE FESTI-VILLAGE

Algemeen openbaar jaorvergadering van de Zate hermeniekes.

De Festi-Village waar weer good gevöld met de lui van de zate hermeniekes en die lui die gere dees vergadering bijwoene.

Ederein kraog hij 'ne korten oetlègk euver de nuyen opzat vaan 't konkoer.

Wethawwer Luc Wijnants móos ziech koume verantwoorde euver dee baog van de



aw brögk nao aonleiing van 'nen ingezonde bref.

Actie ZHK van 2006 veur MGS had zoe'n 1200 euro opgebrach. De aktie veur 2007 waor

"de Tent op de Vriethof" vaan 't Roed Kruus.

Die actie heet oondertösse ruim 1500 euro opgebrach.

Daonao kaom buteredner Peter Vaessen us alles vertèlle euver getrouwid zien.

De ganse Festi-Villlage heet gesjöddelt tijdens dees geweldege buut.

De Loting is oonder 't oug van zienen Hoegen Hoegöstigheid Stadsprins Roland d'n lerste good verloupe.

Nr 1 : Sjroot '83

Nr 11 : Fine Fleur

Nr 22 : Erremooj Trouf

Nr 33 : Kwopper & Co

De kemissie Boetegebäöre

De vergadering woort netuurlek aofgesloten met de oongeëvenaarde roondvraag boe de Oppermoeljaan van "us" (Guido Oomen) allerlei details heet aangehaold en ederein de lès weer 'ns heet geleze, op de meneer wie dat mer eine kin, op de meneer van Guido.

DINSDAG 20 FIBBERWARIE KONKOER

11:11 oor

"Sjiek" oontbijt veur nummer 1 "Sjroot '83" bij Cafe Sjiek door Robin Berben. Deen hier heet met us aan de weeg het gestande vaan 't groet oontbijt met 1400 maan in 2000.

Heer heet aangegeve tot heer de (sprekwoordeleke) pan vaan dat oonbijt wèl doorgeve.

Vaanaof 12:30 oor lòp de binnestad vol met Hermeniekes die ziech bij de versjèllende "jurykaffees" speuleneterend prizzentere aan de kaffeejuries

14:00 oor Konkoer.

Dit jaor had 't Konkoer 'n facelift gekregen.

Um miejer lui te laote genete waor d'r e serjeus podium opgebouwd.

Neet allein veur de jury meh speciaal veur de Hermeniekes.



Noe kóste miejer lui angs de kant genete vaan al die sjoen pekskes en klaanke.

D'r waore nui én ervare jurylede die zier actief waore.

Mèt hòlp van speciaal technieke woort onder mie d'n ammezuur gemete,
bepaold wee de langste veendeldreger had en wee de dikste Zjiem.

De kemissie Boetegebäöre

Samegeteld met de "performance" ofwel 't optrejje, waor dat weer good veur allemaal 'nen ierste pries.

Door dee nuie opzat, same met geweldeg weer, koste veer weer spreke vaan e geslaag konkoer met zoe 'n 48 deilnummende hermeniekes. Roond 18:00 oor woort de lètste ierste pries oetgerek.

Daank netuurlek aan de Vriethoondernummers, 't Merret kommitie, de oondernummers vaan 't Slevrouwe plein, Cafe Sjiek, alle jurylede en alle vrijwellegers.

De lètste mominte.....



De kemissie Boetegebäöre

Zjus wie op de zoondag- en maondagaovend woert ouch op Vastelaovendsdinsda gaovend de cramignon geloupe langs de bekinde Vastelaovendsmonuminte. Daonao waore de kaffees in 't Jekerkerteer aan de beurt um mèt e bezeuk te weurde verierd. En wie 't mèt alles geit wat leuk, gezèlleg en sjoen is ; d'r kump väöl te gaw 'n ind aon. Veurtot v'r 't in de gate hadde leep de klok alweer riechting 't middernachtelek oor. Tied um aofsjeid te goon numme vaan de Vastelaovend 2007 en vaan Prins Roland I. Op 'ne bomvolle Vriethof kloonk nog eine kier 't Mestreechs Volksleed, traone vloejde, Prins Roland lieverde ziene scepter en Prinsemöts in en woort weer gewoen: Roland Dear.



Vastelaovend 2007 waor weer veurbij!!



In Memoriam

LOU VLEUGELS

In 1977 is Lou Vleugels Tempeleer gewoerde. Binne eus organisatie waor heer o.a. lid vaan de P.R. kemissie en verzörgde versjèllende jaore 't jaoverslaag. Lou waor, neve zien baon in 't onderwies, maotsjappelek zier actief es (bestuurs)lid vaan versjèllende cultureel en kérkeleke organisaties. E zweo oto oongelök lag häöm de nudege beperkinge op en daodoor waor heer minder 'inzèbaar' um mèt oet te trèkke. Dat weerheel häöm evels neet devaan um ziech op de huugde te hawwe vaan alles wat binne de vereining gebäörde. Op 21 nov. 2006, kort nao de Jaorvergadering, is Lou gestorve en e paar daog later is heer mèt Tempeleers-ier vaanoet zien geleefde Slevrouwebasiliek nao zien leste rösplaats oetgeleide gedoon. Lou bedaank veur dienen inzat gedurende 29 jaor veur de Mestreechter Vastelaovend in 't algemeen en De Tempeleers in 't bezunder.



KIEN FRANTZEN – OLDENBROEK

Kort naotot v'r aofsjeid hadde genome vaan euze collega-Tempeleer Lou Vleugels woorte v'r geconfronteerd mèt 't beriech tot Kien Frantzen – Oldenbroek gestorve waor.

Kien waor de stèl krach achter euzen Tempeleer Herman Frantzen.

Dao boe Herman kós florere in z'n rol es Tempeleer woort thoes gezörg tot 't häöm aan nik's mankeerde. Dao zörgde Kien wel veur.

Tot 't momint ziech aondeende tot de rolle woorte umgedreid en Kien verzörging nudeg had.

Oondaanks zien broze gezondheid naom Herman die verzörging zoe lang meugelek op ziech. Nao e kort verbliif in 't Hospice heet Kien in alle rös op 15 december 2006 aofsjeid genome vaan dit eerdse leve.



In Memoriam

JAN VAN DE BERGH

In 1970 woort Jan, same mèt nog 'n aontal zier capabel Mestreechtenere door d'n toenmaolege Prizzedent-Tempeleer Jacques Chappin gevraog um Tempeleer te weurde.

Mèt groete gedrevenheid heet Jan es Tempeleer de Mestreechter Vastelaovend 37 jaor gedeend.

Jaorelaank waakde Jan euver de kwaliteit vaan 't Prinsbal.

Es Medaaljelesjatbewaorder heel heer hiel secuur bij wee en wenie 'n medaalje vaan de Prins had gekrege en veural in wat veur 'n gradatje.


Ouch waor Jan aktief es 't ging um 't binne hole vaan sent via z'n "Particuleer-aktie".

Same mèt Tempeleer Dré Abrahams z.g. maakde Jan e begin aon 't rubricere en archivere vaan Tempeleerszake.

Wie z'n gezondheid häöm in de steek begós te laote, bleef Jan toch op afstand 't wel en wee binne de vereiniging volge.

Jan bleef Tempeleer in hart en nere tot 't allerlèste momint. Op 28 mei 2007 is heer gestorve en op 2 juni höbbe veer Jan nao zien leste rösplaats gebrach aan d'n Toongerseweg.

Veer zien häöm väöl daank versjoldeg veur al 't ginnege wat heer gedoon heet veur de Mestreechter Vastelaovend.



De Tempeliers

(situatie van 11 nov. '06 tot 11 nov. '07)

Besjermhier

Drs. Gerd Leers,
Börgemeister van Mestreech

Iere-Besjermhier

Mr. Philip Houben
Aajd Börgemeister van Mestreech

Iere-Tempelieer

Funs Wolfs

Protecteursraad

drs. Gerd Leers, veurzitter
drs. L. Brans Brabant
mevr. M.L.H. Depondt-Olivers per
2.10.2007
ir. Th. Goossens
drs. F. L.J.F. Jadoul per 2.10.2007
dr. ir. J.G.M. de Jong
mr. E. Q.F. Klomp
M.M.J. Mourmans
R. Persoon
dr. ir. J. Ritzen
P.M.E. Thijssen per 2.10.2007
drs. L.B.M. Verzijlbergh per 2.10.2007
mr. E. de Vries

Bestuur

Peter Reijnders, Prizzedent
Jean-Louis Tuinstra, Vice-Prizzedent
Nico Kempeners, te kretser
Marcel Janssen, Habsjaar

Frans Buytendijk,
veurz. Kanselarijraad

Guy Bannier,
veurz. Binnegebäöre

Willy Verweij,
veurz. Financieel kemissie

Fred Sleebe,
veurz. P.R. kemissie

Maurice v.Engelshoven,
veurz. Boetegebäöre

Vervolg bestuur

Jan Janssen, Sirremoniemeester
Willy Massot, directeur Maggezijn
Frits Jongen, oetbelder

Lede

Bert Beenkens
Jan van den Bergh † 28.05.2007
Lou Buytendijk
Lon Cimmermans tot maart 2007
John van Dijk
Rob Dohmen
Servé Feij tot september 2007
Pol Feron
Wielie Fey
Wim Fischer
Herman Frantzen
Léon Geurtjens
Tom Gilissen
Willy Hageman
Han Hoogma
Henk de Jong
Vic Kamm
Pascal Keulers
Bér Kleijnen
Willem Kroon
Loe Lausberg tot november 2007
Hans Linnemann
Jef Loontjens, Sikkertaris-Ginneraoel
Boy Olivers
Charles Peeters
Jo Ramaekers
Luc Schoonbrood
Pie Steffens
Lou Vleugels † 21 november 2006
Raymond Willems
John Zeguers

De Tempeliers

DE ORGANISATIE

Kemissie Boetegebäöre

Maurice van Engelshoven, veurzitter
Daniëlle Berghmans

Rob Dohmen

John van Dijk

Peter van de Eerden

Tiny Engelbert

Pol Feron

Leon Hensels

Han Hoogma

Frans Jozef Jansen

Jan Janssen

Loe Lausberg tot november 2007

Frans Leltz

Hans Linnemann

Jef Loontjens

Jef Persoon

Jo Ramaekers

Jean Rossell

René Stallinga

Twajn Vermin

Maggezijn

Willy Massot, directeur

Pierre Dassen, beheerder

Harry Aerdt

Leo Beckers

Frans Boosten

Jacques Cramer

Jan Hameleers

Roger Hameleers

Michel Jungsleger

Clim Trines

Charles Walthie

De Trèkkers

Servé Meerten, veurzitter

Peter Aarts

Raymond Bergmans

Raymond Brands

Ralf Caenen

Hennie Coenen

Ton Dello

Jos Detisch

Guido van Dijck

Rinus de Groof

Herman Kersten

Francois Pletsers

Marcel Rassin

René Stallinga

Ed Strijp

Peter Stroes

John Wagemans

Marcel Zeegers

Kemissie Binnegebäöre

Guy Bannier, veurzitter

Marion de Bont

Gerda Botty-Prinse

Iris Castro

Fabienne Duchateau

Ursula Garnier

Noël Jaegers

Roel Janssen

Henk de Jong

Pascal Keulers

Marijke Kroon

Willem Kroon

Rens Lasoe

Lilian Limpens

Patrick Muijtjens

Susanne Muijtjens-Loontjens

Roger Niël

Jef Persoon

Luc Schoonbrood

Huub Stevens

Ed Strijp

Peter Stroes

Frans Theunisz

Vincent vanderBroeck

Frank Verhees

Etiënne Vroemen

Henk Weerts

Patrick van de Weyer

Evert-Jan Zelders

De Tempeleers

Kanselarijraad

Frans Buytendijk, veurzitter
Bert Beenkens, raodshier
Wim Fischer, raodshier
Jan Janssen, Sirremoniemeester
Frits Jongen, Medaaljelesjatbewaorder
ef Loontjens, Sikkertaris-Ginnaerol
Boy Olivers, raodshier
Jean-Louis Tuinstra, Vice-veurzitter
Raymond Willems, Marchal Funkeleer

Nico Brennert, chauffeur Prins
Bèr Janssen, chauffeur Tempeleers

't Garde-Rizzjemint de Kachelpiepers

Kretserij/Archief

Nico Kempeners, kretser
Jopie Franssen
Egon Smeets

Financieel Kemissie

Willy Verweij, veurzitter
Jan v.d. Bergh † 28.05.2007
Henri Borgignons
Jo Bosch
Trudie Bosch-Keerssemeckers
Ton Dello
Wielie Fey
Leon Geurtjens
Ton Gilissen
Willy Hageman
Marcel Janssen, Habsjaar
Boy Olivers
Katja Rodts
Ton Schoenmaeckers
Luc Schoonbrood
Lizette Stallinga
John Zeguers

*Subkemissie Gala Sponsor aovend es
oonderdeil vaan de Financieel Kemissie*
Leon Geurtjens , veurzitter
Tom Gilissen
Miel Keerssemeckers, kretser
Pascal Keulers
Raymond v.d. Nobelen

Luc Overhof
Math Schoenmaeckers
Servé Tillie
Willy Verweij
Eugène Vingerhoeds
Sjaak Waltmans
Funs Wolfs

P.R. Kemissie

Fred Sleebe, veurzitter
Rob Christiaans
Lon Cimmermans tot miert 2007
Servé Feij tot september 2007
Bèr Kleijnen
Loe Lausberg tot november 2007
Emile Meuwissen sins januari 2007
Fernand Paulissen sins augustus 2007
Charles Peeters
Nicole Sleebe

Epiloog

Es samenstellers vaan dit jaorverslaag hope veer tot geer de Vastelaovend 2007 op 'n plezerege meneer höb mage beleve.

't Waors e good sezoen mèt chique en geslaagde eveneminte boe veer gruuts op trök mage loere.Tegeliekertied heet Slivvenier mèt de Vastelaovendsdaog aon us gedach, gezeen 't feit tot 't prachteg weer waors.



Veer höbbe neet de pretentie gehad um alles te besjrieve. Veer hope tot geer dat kint begriepie.

Meh dii beukskie gief toch 'n good euverziech vaan wat De Tempeleers in 't aof geloupe jaor.
höbbe gedoon in 't belaank vaan de Vastelaovend en gemeinsjap van Mestreech.

De Tempeleers höbbe dat evels neet allein gedoon en zien daorum väöl daank versjöldig aon:

B&W en de Gemeinteraad Mestreech
D'n Deens Stadsbeheer en Facilitaire zake
Brandweer
Pelitie
GGD

Alle Börgermètwérkers in de versjèllende kemissies
Ederein dee door ziene/häöre financiële steun de rangatie vaan de Vastelaovend meugelek maakde.
Mer veural bedaanke veer hiel gruuts

't Volk vaan Mestreech

Colofon

Oetgaof	Stiechting De Tempeleers p/a Kochstraot 6 6216 ER Mestreech
Samestèlling	Tempeleers Guy Bannier en Nico Kempeners
Bewèrk door	Tempeleer Jean Louis Tuinstra
Oplaog	650 stöks
Fotoos	Noël Jaegers
Drök	T.O. Offset - Gijsemberg

